

原機啟微

原機啓微序

原機啓微一書敕山老人所著也敕山吳人生勝國
時卒於洪武初少受書碧山湯公得其疏通知遠之
旨好積墳素多至五千卷重屋樓之恣其探討以
才傳聞或勸之仕則曰貴官有命不可強也時元季
崩剝意不欲仕亂世故謾應云晚置別墅於敕山逍
遙物外自稱敕山老人人亦隨稱之敕山嘗讀黃帝
內經慨然歎曰窮而在下可以濟人利物者其惟醫
乎乃益發古今方書研究而會通之不數年盡能工
其術其治人無問貴賤里女內外大小凡所治咸効

專以慈仁爲意未嘗邀譽謝故施惠博而道益尊浙
河之西其聲錫然震也其書載治眼一科書凡二卷
上卷論病疾之原下卷論方劑之宜以及君臣佐使
從逆反正之義其說甚明使人可按疾而治治罔不
奇効者救山之用心如此可謂仁矣他所著方書竝
行於世不特專是科也今之爲醫者大抵守師說如
傷寒內傷帶下小兒各專門自高殊不能相通此豈
可與論玄命之奧哉治眼絕無古傳方雖張仲景李
明之諸公論醫之詳庶幾神妙而於是猶略略也後
之學者無所師故日疾爲最難治夫醫者意也非其

心明乎天人之際察乎古今之變卓然有所見焉烏
可以易言哉是書析理至精明法制具備文詞爾雅成
一家言殆有超乎方術之外者雖達之爲政可也敕
山之學其能以涯涘窅乎予舊藏寫本顧多訛謬不
敢輕以試人南京太醫院院判薛公新甫見之曰此
書予求之久矣今幸見之先生所請梓焉以廣其傳
仍撰次已所見聞爲二卷附於後薛公亦吳人以醫
顯生平著述甚富藏之山方副在家集能行其學者
也此書之傳絕且百餘年而至新甫而復行後之人日
蒙利焉新甫可謂同敕山之用心矣敕山姓倪氏名

維德其行事具宋太史墓銘子仁序是書之始末云
嘉靖壬辰春南京禮部祠祭司主事長洲王庭書

原機啓微上卷目錄

淫熱反剋之病

風熱不制之病

七情五賊勞役饑飽之病

血爲邪勝凝而不行之病

氣爲怒傷散而不聚之病

血氣不分混而遂結之病

熱積必潰之病

陽衰不能抗陰之病

陰弱不能配陽之病

心火乘金水衰反制之病

內急外弛之病

奇經容邪之病

爲物所傷之病

傷寒愈後之病

強陽搏實陰之病

亡血過多之病

癰疹餘毒之病

深疳爲害之病

原機啓微上卷

薛氏醫案

元救山

老人

倪維德著

吳郡薛已校

新都吳玄有閱

淫熱反剋之病

膏粱之變滋味過也氣血俱盛稟受厚也亢陽上炎陰不濟也邪入經絡肉無禦也因生而化因化而熱熱爲火火性炎上足厥陰肝爲木木生火母妊子子以淫勝禍發反剋而肝開竅於目故肝受剋而目亦受病也其病眵多眊躁緊澀赤脉貫睛臟腑祕結者爲重重者苟藥清肝散主之通氣利中丸主之眵多

耗燥緊澀赤脉貫睛臟腑不祕結者爲輕輕者減大
黃芒硝芍藥清肝散主之黃連天花粉丸主之少盛
服通氣利中丸目眶爛者內服上藥外以黃連蘆甘
石散收其爛處兼以點眼春雪膏龍腦黃連膏啗鼻
碧雲散攻其淫熱此治淫熱反剋之法也非膏粱之
變非氣血俱盛非亢陽上炎非邪入經絡毋用此也
用此則寒涼傷胃生意不上升反爲所害病豈不治
而已也噫審諸

風熱不制之病

動物而生於熱譬以烈火焰而必吹此物類感召

而不能違間者也。因熱而召是爲外來，久熱不散感
而自生是爲內發。內外爲邪，惟病則一。淫熱之禍條
已如前，益以風邪害豈纖止風加頭痛風加鼻塞風
加腫脹風加滄淚風加腦巔沈重風加眉骨酸疼有
一於此羌活勝風湯主之。風加癢則以杏仁龍膽草
泡散洗之。病者有此數證或不服藥或誤服藥翳必
隨之而生翳如雲霧翳如絲縷翳如秤星翳如秤星
者或一點或三四點而至數十點翳如螺蓋者爲病
久不去治不如法至極而至也。爲服寒涼藥過多脾
胃受傷生意不能上升漸而至也。然必要明經絡庶

能應手翳凡自內眥而出爲手太陽足太陽受邪治
在小腸膀胱經加蔓荊子蒼朮羌活勝風湯主之自
眥眥客主人而入者爲足少陽手少陽手太陽受邪
治在膽與三焦小腸經加龍膽草藁本少加人參羌
活勝風湯主之自目系而下者爲足厥陰手少陰受
邪治在肝經心經加黃連倍加柴胡羌活勝風湯主
之自抵過而上者爲手太陽受邪治在小腸經加木
通五味子羌活勝風湯主之熱甚者兼用治淫熱之
藥啖鼻碧雲散俱治已上之證大抵如開鍋蓋法
隨効然力少而銳宜不時用之以聚其力雖然始

者易而久者難漸復而復漸復而又復可也急於復者則不治今世醫用磨翳藥者有之用手法揭翳者有之噫翳猶瘡也奚斯愈乎庸者用此非徒無益增害猶甚愚者受此欣然而不悞可歎也哉故置風熱不制之病治法

七情五賊勞役饑飽之病

陰陽應象大論曰天有四時以生長收藏以生寒暑燥濕風寒暑燥濕風之發耶發而皆宜時則萬物俱生寒暑燥濕風之發耶發而皆不宜時則萬物俱死故曰生於四時死於四時又曰人有五藏化爲五氣

以生喜怒憂悲恐喜怒哀憂悲恐之發耶發而皆中節則九竅俱生喜怒哀憂悲恐之發耶發而皆不中節則九竅俱死故曰生於五藏死於五藏目竅之一也光明視見納山川之大及毫芒之細悉雲霄之高盡泉沙之深至於鑒無窮爲有窮而有窮又不能爲窮反而聚之則乍張乍歛乍動乍靜爲一泓一點之微者豈力爲強致而能此乎是皆生生自然之道也或因七情內傷五賊外攘饑飽不節勞役異常足陽明胃之脉足太陰脾之脉爲戊巳二土生生之原也七情五賊總傷二脉饑飽傷胃勞役傷脾戊巳旣病則生

生自然之體不能爲生生自然之用故致其病曰七情五賊勞役饑飽之病其病紅赤睛珠痛痛如刺刺應太陽眼睫無力常欲垂閉不敢久視久視則酸疼生翳皆成陷下所陷者或圓或方或長或短或如點或如縷或如錐或如鑿證有印此者柴胡復生湯主之黃連羊肝丸主之痛睛甚者當歸養榮湯主之助陽活血湯主之加減地黃丸主之決明益陰丸主之加當歸黃連羊肝丸主之龍腦黃連膏主之已上數方皆羣隊升發陽氣之藥其中有用黃連黃芩之類者去五賊也噉鼻碧雲散亦可見用最忌大黃芒硝

牽牛石膏梔子之劑犯所忌則病愈振

血爲邪勝凝而不行之病

血陰物類地之水泉性本靜行其勢也行爲陽是陰中之陽乃坎中有火之象陰外陽內故行也純陰故不行也不行則凝凝則經絡不通經曰足陽明胃之脉常多氣多血又曰足陽明胃之脉常生氣生血手太陽小腸之脉斜絡於目眥足太陽膀胱之脉起於目內眥二經皆多血少氣血病不行血多易凝靈蘭秘典論曰脾胃者倉廩之官五味出焉五味淫則傷胃胃傷血病是爲五味之邪從本生也又曰小腸者

受盛之官化物出焉遇寒則阻其化又曰膀胱者州
都之官津液藏焉遇風則散其藏一阻一散血亦病
焉是爲風寒之邪從末生也凡是邪勝血病不行不
行漸滯滯則易凝凝則病始外見以其斜絡目眥耶
以其起於目內眥耶故病環目青黯如被物傷狀重
者白睛亦黯輕者或成斑點然不痛不癢無淚眵眊
瞤羞澁之證是曰血爲邪勝凝而不行之病此病初
起之時大抵與傷風證相似一二日則顯此病也川
芎行經散主之消凝大丸子主之睛痛者更以當歸
養榮湯主之如此則凝復不滯滯復能行不行復行

邪消病除血復如故志此無所不愈也不志於此無所愈也

氣爲怒傷散而不聚之病

氣陽物類天之雲霧性本動聚其體也聚爲陰是陽中之陰乃離中有水之象陽外陰內故聚也純陽故不聚也不聚則散散則經絡不收經曰足陽明胃之脉常多氣多血又曰足陽明胃之脉常生氣生血七情內傷脾胃先病怒七情之一也胃病脾病氣亦病焉陰陽應象大論曰是厥陰肝主目在志爲怒怒甚傷肝傷脾胃則氣不聚傷肝則神水散何則神水亦